



Komunikadu Imprensa

Tribunál Distritál Dili

28 Setembru 2015

Tribunál Distrital Dili kondena pena tinan 8 fulan 6 prizaun ba arguidu Calistro Gonzaga relasiona ho kazu sekuestru no la partisipasaun

Iha 25 Setembru 2015, Tribunál Distritál Dili kondena eis Komandante Investigasaun Kriminál PNTL, Calistro Gonzaga ho pena prizaun tinan 8 fulan 6 hosi alegasaun tinan 10 prizaun ministériu públiku nian. Tribunál konklui katak arguidu totalmente provadu komete krime sekuestru (detein ema sein ordem judisiál) no la partisipasaun (husik sidadaun Indonezia na'in 4 no Afrikanu na'in 1) ne'ebé involve iha krime droga fila ba autóridade *Badan Narkotika Nasional (BNN)*, Indonezia, iha 20-26 Outubru 2012.

Tribunál konsidera arguidu nu'udar Komandante Investigasaun Kriminál PNTL, tenta desvia-an hosi prosesu ne'e no lori fila suspeitu sira ba Indonezia sein koñesimentu hosi ministériu públiku maske arguidu hatene klaru katak ministériu públiku mak nu'udar nain ba asaun penál hotu-hotu.

“JSMP hanoin desizaun ne'e hatudu kualidade impresivu iha servisu instituisaun judisiáriu sira nian tanba bele maneja no ultrapasa presaan oioin durante prosesu ne'e. Prosesu ne'e rasik la'os fasil tanba aleinde involve ofisial polísia nível aas, involve mós figura infleunsiadu sira ne'ebé tenta atu impoin prosesu ne'ebé ses hosi normalidade prosesu kriminál nian”, dehan Diretor Ezekutivu JSMP, Luis de Oliveira Sampaio.

Tribunál konklui desizaun ne'e bazeia ba deklarasaun arguidu katak nia rasik mak akompañia suspeitu na'in 5 ne'e to'o iha Jakarta, Indonezia. Aleinde ne'e, tribunál prova liuhosi depoimentu hosi testemuña xavi sira, ne'ebé depoimenta katak arguidu haruka suspeitu nain lima ne'e bazeia ba MOU entre nasaun Timor-Leste no Indonezia. Mesmu nune'e, iha produsaun ba provas, tribunál hare katak la klauzula ida hosi MOU defini obrigasaun espesifiku katak suspetu ba krime sira ne'ebé hetan kaptura hosi Polísia Timor-Leste tenke entrega ba Indonezia.

Tribunál mós hetan prova dokumental seluk mak hanesan pasaporte, asinatura entre arguidu no BNN relasiona ho prosesu transferensia ba suspeitu nain lima ne'e.

Rua setubal, Colmera, Dili Timor Leste

PoBox: 275

Telefone: 3323883 |77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Bazeia ba provas hirak ne'e, tribunál konklui katak arguidu provadu kontra artigu 160 Kódigu Penál kona-ba krime sekuestru no artigu 286 Kódigu Penál kona-ba krime la partisipasaun. Hosi krime diferente rua ne'e tribunál aplika pena prizaun tinan 4 ba krime sekuestru no tinan 4 fulan 6 ba krime la partisipasaun. Hosi krime rua ne'e tribunál akumula pena hodi aplika pena únika tinan 8 fulan 6 prizaun ba arguidu no selu taxa judisiál US\$40.00.

Antes remata leitura akordaun ne'e, tribunál informa katak, tribunál estrai ona sertidaun ba ministériu públiku nu'udar nain ba asaun penal atu loke prosesu inkéritu hasoru testemuña Kay Rala Xanana Gusmão, iha momentu krime ne'e akontese nu'udar Ministru Defeza no Seguransa ne'ebé fo orden no orientasaun ba arguidu hodi halo vijilansia no fo orden haruka fila suspeitu nain lima.

Aleinde ne'e mós, loke prosesu ba Longinhos Monteiro, iha momentu ne'ebá nu'udar Komandante PNTL ou arguidu nia superior ne'ebé fo orden no orientasaun ba arguidu hodi halo vijilansia ba suspetu nain lima no kontinua lori sira ba Indonezia.

Kazu ne'e rejistu iha tribunál ho Número Prosesu: **1227/12. PDDIL**. Leitura akordaun prezide hosi representante juis koletivu, Dr. Jose Maria de Araújo. Enkuantu Ministériu Públiku representa hosi Dra. Angelina Saldanha no Dr. Fernando de Carvalho ne'ebé substitui Dr. Sergio Quintas nu'udar arguidu nia defensor.

Atu hetan informasaun liutan bele kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org